



PREZIDÊNCIA KONSELLU MINISTRUS

VI GOVERNUN KONSTITUSIONÁL

DÍLI, LORON 14 FULAN-ABRÍL TINAN 2015

KOMUNIKADU IMPRENSA

Sorumutu Konsellu Ministrus nian iha loron 14 fulan-abríl tinan 2015

Konsellu Ministrus hala'o sorumutu iha tersa ne'e, loron 14 fulan-abríl tinan 2015, iha sala sorumutuk Konsellu Ministrus nian, iha Palásiu Governu nian, iha Dili, no aprova ona diploma rua no analiza mós apresentasaun tolu:

1. Rezolusaun Governu nian ne'ebé aprova kriasaun Komisaun Organizasaun nian ba Komemorasaun sira ba tinan 500 kona-ba Afirmaun Timor nia Identidade Foun

Diploma ida ne'e define harii Komisaun Organizasaun nian ba Komemorasaun tinan 500 kona-ba Afirmaun Timor nia Identidade Foun. Komemorasaun sira ne'e sei hala'o iha tinan ida ne'e, ho nia pontu aas liu loron 28 fulan-novembru. Komisaun ne'e, ne'ebé membru Governu nian barak maka halo parte, sei sai nu'udar responsável atu prepara eventu komemorativa sira, no hodi tetu mós abordajen ida ne'ebé istória, kulturál no intelektuál.

Atu fó hanoin fali de'it katak, komemorasaun ida ne'e hala'o ho intensaun atu hanoin-hikas navegadór no minisionáriu portugés sira bainhira to'o iha Lifau, Oekusi Ambenu, no reprezenta marku istóriu ida iha afirmasaun Timor nia identidade foun no iha konstrusaun Timor-Leste nian.

2. Dekretu-Lei kona-ba Konsellu Kombatente Libertasaun Nasionál nian sira

Dekretu-Lei ida regulamenta natureza jurídika, estrutura, objetivu no kompeténsia sira Konsellu Kombatente Libertasaun Nasionál nian sira.

Konsellu Kombatente Libertasaun Nasionál harii iha tinan 2011, bainhira Parlamentu Nasionál aprova tiha alterasaun ba lei n.º 2/2002, loron 23 fulan-marsu. N.º 3 husi artigu 35.º Lei ida ne'e nian define katak "Estrutura Konsellu Kombatente Libertasaun Nasionál ninian define ona ho Dekretu-Lei, liuhusi konsulta ho organizasaun hirak ne'ebé reprezenta Kombatente Libertasaun Nasionál nian sira".



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608

Iha tinan hirak ikus ne'e, dezenvolve ona asaun konsulta oioin ba kombatente sira hodi koa'lia kona-ba diploma ida ne'e.

Tanba ne'e, Dekretu-Lei ne'e aprova ona hosi Konsellu Ministrus hodi konfere ho Kombatente sira kna'ar determinante ida iha promosaun dezenvolvimentu sustentavel Timor-Leste nian, iha pas no estabilidade sosial nasaun nian, hodi fo ba sira kna'ar hirak entidade konsulta nian hosi Governu.

Ho intensaun hodi hanoin loron 3 fulan-marsu tinan 1981, loron hahu organiza fali Rezistencia iha periodu ne'ebe maka difisil liu hosi Istoria Luta Libertasaun Nasionál nian, ne'ebe decide ona hodi konsidera loron ne'e hanesan Loron Nasionál Veteranu sira nian.

Aprezentaun tolu ne'ebe Konsellu Ministrus analiza maka:

1. Aprezentaun kona-ba Kreximentu Populasaun Timor-Leste nian to'o tinan 2030 no ninia Implikasaun sira ba Dezenvolvimentu Nasionál

Ekipa ida husi Universidade Flinders, iha Adelaide, Austrália, ne'ebe lidera husi Dr. Udo Saikia, apresenta ba Konsellu Ministru Estatál "Projesaun ida kona-ba kreximentu no kompozisaun populasaun Timor-Leste nian to'o tinan 2030 no ninia implikasaun setorial sira". Estudu ne'e nia objetivu maka estabese sistema ida kona-ba medida sira ne'ebe maka bele defini politika hirak ne'ebe foka ba-iha promosaun moris-di'ak no kualidade moris populasaun sira nian, liliu ba foin-sa'e sira.

2. Aprezentaun kona-ba Komisaun Nasionál Eleisaun ninia papel no atividade sira

Komisariu sira husi Komisaun Nasionál Eleisaun nian halo prezentaun jerál ida ba Konsellu Ministrus kona-ba sira nia knaar no atividade sira, liuliu enkuadramentu jerál, área intervensaun nian, kompozisaun, no ninia intervensaun iha ámbitu siklu eleitoral sira nian.

3. Aprezentaun kona-ba reforma ba estrutura sira lideransa komunitaria nian

Ministru Estadu, Koordinador Assuntu Administrasaun Estadu nian no Ministru Administrasaun Estatál hamutuk ho Vise-Ministru Administrasaun Estatál apresenta ba Konsellu Ministrus proposta ida kona-ba revizaun ba modelu organizaun lideransa komunitaria sira nian ho hanoin atu estabese modelu organizaun no designasaun nian ba lider komunitariu sira ne'ebe mak besik liu ba padraun tradisional Timor-Leste nian. Prinsipiu fundamentál sira ne'ebe sei orienta revizaun kuadru legal lideransa komunitaria sira nian, mos, estabese ona.

